

Taras: Scolars intaglian sculpturas da glatsch

Lavurar cun material natural

Avant trais ons ha gnü lö sün iniziativa da la magistraglia da Tarasp la prüma concurrenza d'intagliar sculpturas da glatsch. Ingon realiseschan darcheu scolars da Susch fin Tschlin d'urant il venderdi chi vain lur ouvas.

(anr/map) Illa stanza da la terza classa da la scuola reala esa quiet. Ils ot scolars dal magister Jachen Puorger sun fatschendats cun tagliar material dad oasis. Il magister ha tschernü quist material per parderdscher a la lavur da las sculpturas: «Id es ün material lom chi s'affa bain per fuor mar illas trais dimensiuns.»

Ils Simpsons our da glatsch

Jachen Puorger ha fat sias experiencias avant trais ons: «Quai es üna lavur enorm fascinanta, il glatsch es lom sco'l painch.» Sia classa ha decis da preschentar a Tarasp la famiglia da comics Simpson. Veronica tradischa co chi sun gnüts sün quist'idea: «No eschan its sonda passada a verer il musical 'Ewigi Liebi' ed aint il trenans es gnü quist impissamaint.» Uossa suna landervia a provar da fuor mar üna da las tschinch persunas da la famiglia. Adüna duos d'els fan üna miniatura da la persuna chi varà a Tarasp la grondezza naturala. Be per Manuela nun es l'intagliar in glatsch üna novità: «Avant trais ons n'haja pudü intagliar ün cristall cun meis conscolars da Ftan.» Il tema da quella jada d'eira l'Engiadina e plü d'ün s'algora da las stupendas sculpturas

realizadas sco'l girun barbet, la biera da Tschlin, ils bobists o la clav rumantscha per nomnar be ün pèr. Cha l'incumbenza da far persunas saja magari pretensiusa, manaja Puorger. Federico es landervia a fuor mar a «Bart Simpson», Francisco fa il bap «Homer», Veronica e Christiane han creà la mamma «Marge», Manuela e Sabina as confuondan cun «Maggie» e Curdin schaschina cun «Lisa». Tuots s'allegran da pudair ir a Tarasp a crear las figüras cun s-chalpens fins e largs. La classa survgnirà quatter blocs da glatsch dad 1,70 meter lunghezza e 50 centimeters largezza e da circa 30 centimeters grossezza.

Di da creaziun: 30 schner

Per la preparaziun e l'organisaziun da quist evenimaint sun respunsabels Aglaia Gallmann Josty e Jon Grass. Il prim ha stuvü gnir taglià oura ün toc dal glatsch dal lai per ch'el possa dschelar inandret. Marcurdi güdan ils magisters partecipats a trar oura cun zappins ils blocs da glatsch chi vegnan resgiats cun üna resgia a motor e chi vegnan miss al lö giavüschà da las differentas classas. In tuot as partecipeschan raduond 150 scolars e scolars da la quarta a la nouvavla classa, da mincha cumün es gnüda invidadada üna classa. Las sculpturas vegnan intagliadas d'urant il venderdi, 30 da schner, da las 10.00 a las 16.00. Üna giuria culs trais artists Daniel Cotti, Otmar Derungs e Markus Buschor valütescha las lavuors e surdà premis a las prümas trais gruppas. La rangaziun ha lö a las 20.00 sül lai da Tarasp.

Bod o tard ha il runal Quaunas da far piazza al sviamaint

Il runal da Sta. Maria vain liquidà

Ils acziunaris dal Runal Quaunas SA han decis da schoglier la società anonima e da demontar il runal a Sta. Maria. Per survgnir la concessiun füssan da far grondas investiziuns. Ün runal nov nu vain causa il futur proget d'ün sviamaint neir in dumonda.

Nicolo Bass

Dal 1966 es gnüda fundada a Sta. Maria in Val Müstair üna società anonima cul böt da fabricar ün runal a Quaunas per cha'ls uffants posan imprendir ad ir culs skis. Quist runal da raduond 600 meters lunghezza es stat il prim runal in Val Müstair. «Quia han blers uffants imprais ad ir culs skis», declera il president da la società anonima Runal Quaunas SA, Alfred Fliri. Vaira sgür ha fat quia eir il skiunz Urs Imboden seis prüms experimaints sül skis. «Il runal d'eira avert da december fin marz», quinta Not Manatschal, commember dal cussagl administrativ e respunsabel per las finanzas, «e las entradas dal runal bastaivan güsta per indemnisar ils lavuraints». Intant es il runal dvantà plü vegl ed i füs stat da far diversas lavuors da sanaziun. «Ils ultims tschinch ons vaina eir gnü problems per survgnir la concessiun», declera Manatschal inavant. Per garantir la sgürezza necessaria füssan tenor il chaschier statts da far investiziuns da raduond 50 000 francs. Però adonta da quistas investiziuns



Il runal Quaunas vain quista stà demontà e la società anonima vain scholta.

per sanaziuns, füs l'indriz amo adüna stat in seis stadi plütost vegl.

Il runal vain demontà

In october 2007 ha la radunanza d'acziunaris lura decis da serrar il runal per la stagiun d'inviern 2007/08. «Nus vessan sgüra chattà la munaida per las lavuors da sanaziun e survgnir uschè darcheu la concessiun», es il president Alfred Fliri persvas. Il meglter füs però stat d'investir directamaing in ün nov runal chi accumulaischa da prüma innan tuot las pretaisas per la concessiun. Quia vain però pro il fat cha tenor il plan directiv traversa ün eventual sviamaint da la traziun Sta. Maria eir il traget dal runal. «La radunanza cumünala ha nempe decis avant qualche ons per la

variante süd d'ün eventual sviamaint e quella passa directamaing tras il runal», declera Manatschal. Uschè cha bod o tard vess eir ün runal nov da far piazza al sviamaint. «Eir scha quai vess dad ir amo desch ons fin cha'l sviamaint da Sta. Maria vain actual, nun es ün nov runal mai amortisà fin quella jada», agiundscha Alfred Fliri. «Causa quista zona da sviamaint nu's vessa vaira sgür gnanca survgni la concessiun per ün runal nov», es Fliri persvas, «ed il lö dal runal d'eira quia ideal ed ün oter lö nun es mai stat in consideraziun». Perquai ha decis lura la radunanza d'acziunaris in november 2008 da liquidar e schoglier la società anonima Runal Quaunas SA. «In avuost 2009 demontescha la defaisa civila da Horgen nos runal», declera Manatschal.

Purtrets da munaida d'ün artist indigen

Ouvas da l'imperatur Alesch

Actualmaing expuona Alesch Vital munaida i'l Hotel Üja a Scuol. Las ouvas da l'artist sun adüna eir ün tschögn critic invers la situaziun mundiala.

Fadrina Hofmann Estrada

Scha la Helvetia dvainta üna prostituada capitalistica e Guiglelm Tell survain la fatscha dal contemplader, sch'üna nota d'ün dollar es be amo ün aviun da palperi chi svoula vers aval ed ün tschincun es dandettamaing üna staila da sheriff, lura es quai il merit dad Alesch Vital. L'exposiziun ch'el preschainta in venderdi saira i'l Hotel Üja nun es nouva, mo s'affà exactamaing cun nos temp. Güsta uossa culla crisa da finanzas sun ils raps il tema nomer ün illa società. Ils raps dad Alesch Vital pendan inromats vi da la paraid e portan titels sco «Time is money», «Wanted Willi» o «Weltknopf». La munaida elavurada ed inromada es d'argient, tuot ils raps sun originals dal temp fin dal 1980.

«Minchün es imperatur»

L'exposiziun ha gnü lö fingià üna jada avant bundant 30 ons. Las lavuors sun nadas a Vienna ill'«Akademie der bildenden Kunst». Sias ouvas ha segnà l'artist cun «Kaiser Alesch I. von Vital». Co ch'el d'eira dvantà imperatur quinta'l a la preschantaziun uffiziala. Be tant: da la partida d'eiran üna curuna da char-tun alba, ün automat da fotografar e naturalmaing l'artist svessa. «Minchün da nus es seis agen imperatur, regna sur da seis muond e porta a la fin finala tuot la respunsabilità per quel», manaja Alesch Vital.

Helvetia dvainta Kapitalista

Las ouvas dad Alesch Vital han adüna ün messagi e rendan attent a problems mundials. Ün sdunin fat our d'ün tschincun, duos francs ed ün tschinquanterin vain comentà culla frasa: Mangiar la sabgentscha cul sdunin. «E la sabgentscha sun hozindi ils raps», conclüda l'artist. La staila da sheriff fat our d'üna munaida simbolisescha quietezza ed uorden, «mo na minch'uman ha listess sen per uorden». L'ouva cul titel «Time is mo-

ney» muossa üna munaida da desch dollars cun integrada ün'ura da quarz. Sün üna munaida es sü la Helvetia mo là ingio chi staiva seis nom esa scrit «Kapitalista». Il titel da quist'ouva es «Whore». In venderdi saira muossa e declera Alesch Vital l'intera collezziun. Quella nu's poja dal rest cumprar – per ingüns raps dal muond –, be contemplar d'urant tuot la stagiun i'l Hotel Üja. La rapreschantaziun ha lö in venderdi, ils 30 schner, a las 20.30.



A Christiane esa gratià bain da far la mamma dals Simpsons.


fotografia: Mario Pult

SENT

Concert cun program da Joseph Haydn

(anr/map) Avant 200 ons es mort il cumponist austriac Joseph Haydn. In memoria da quist evenimaint preschaintan ils musicists Isabella Klim, Piotr Plawner e Daniel Lappert duos divertimentos dal cumponist renomnà. Plünavant sunan els trios da Karl Stammnitz, Franz Danzi sco eir 18 variaziuns sur d'ün tema da Mozart cha Anton Reicha ha creà. Tuots trais artists sun solists arcugnuschüs chi han

gnü grond success. Els han obtgnü otas distincziuns pro numerusas concurrenzas internaziunalas. Els vegnan ingaschats regularamaing pro festivals ed orchesters renomnats in Europa, America e Giapun, saja quai sco solists o partenaris da musica da chombra. Il concert a Sent cun Piotr Plawner, gĩa, Isabella Klim, cello e Daniel Lappert, flöta, ha lö in dumengia, 1. da favrer, a las 20.15 illa baselgia.



La staila da sheriff fat our d'üna munaida simbolisescha quietezza ed uorden.